

Exitoso Arubadag na Leiden



DEN HAAG – Un cantidad di mas cu 5 mil persona a celebra Arubadag 2009 na Groenordhal na Leiden diadomingo 15 di maart cu a pasa. E celebracion a conta cu bishita di hopi dignitario. E.o. Minister Plenipotenciario di Antias sr. Paul Comenencia, Secretario di Estado pa Asuntonan di Reino sra. drs. Ank Bijleveld, Presidente di Eerste Kamer sra. Yvonne Timmermans-Buck, Presidente interino di Tweede Kamer sr. Jan ten Hoopen, Burgemeester di Leiden sr. drs. Henri Lenferinka. Presidente di Comision permanente di Asuntonan Antiano y Arubano di Tweede Kamer sr. Willibrord van Beek, representante di Embahada di China, Guatemala, Honduras y di Estados Unidos.

Tambe representantenan di organisacionnan social, mentornan y personal di Cas di Aruba a presencia e evento aki, hunto cu un multitude di Arubianonan y nan amigonan.

E celebracion a cuminsa cu maestro di ceremonia Sidney Kock a yama tur hende bon bini pa despues John Francis, Francella y Francis Jacobs a canta nos himno 'Aruba Dushi Tera'.

"E comunidad Arubano na Hulanda merece na por celebra nos dia nacional, pasobra nan tambe ta orguyoso riba nos Himno y Bandera. E celebracion di Arubadag ta inhera riba e sentimentonan di patriotismo bao di nos hendenan, 'asina Minister Plenipotenciario, Frido Croes a bisa. Tambe el a bisa cu tur aña e ta constata con nos Arubianonan ta orguyoso di ta Arubiano y con nan ta bin pa celebra nos dia.

E programa cultural cu a ilustra un calendario cultural a cuminsa cu musica di Dande, canta pa Rey di Dande di Hulanda sr. Marcelino Paesch, acompaña pa Herencia Cultural. Despues John Francis, Francella y Rachel Kraaivanger a canta e cantica "Ken ta Betico" den cuadro di celebracion di Dia di Betico.

Sr. Paul Comenencia a bisa di tin admiracion pa mira cuanto

hende ta bini tur aña pa celebra na un manera festivo e dia di Aruba.

Lord Cachete a finalisa e parti aki cu algun di su Roadmarchnan conoci bao e Arubianonan.

Secretario di Estado pa Asuntonan di Reino sra. Ank Bijleveld-Schouten a hiba un discurso felicitando Aruba cu ta celebrando nan autonomia y nan orguyo pa nan isla. E dia aki tambe ta un dia di solidaridad den Reino, pasobra e celebracion ta tuma lugar na Hulanda y mayoria di esnan presente ta biba akinan, asina sra. Bijleveld a bisa. E mandatario a bisa di cu el a nota cu tur hende cu e papia cune ta orguyoso di loke Aruba a logra. Y esey ta na su lugar, segun sra. Bijleveld, pasobra Aruba su economia ta bon, apesar di e recesion mundial actualmente.

E producto turistico ta di un calidad hopi halto y cordialidad ta worde teni na halto.

Segun e Secretario di Estado Aruba tin experiencia den e proceso pa bira un pais autonomo y ta un ehempel pa loke mester sosode pa Corsow y St. Maarten.

Den su discurso sra. Bijleveld a papia riba e relacion entre Hulanda y Aruba cu ultimo tempo tabata bao preshon. Segun e mandatario lo mester busca manera na defini e razon di cierto critica y lo mester tuma e critica na serio.

'Nos mester crea un clima unda nos ta papia cla riba asuntonan cu ta concerni ambos pais. Esey ta e comienso na busca solucionnan,' asina e mandatario a bisa.

MIR'E ONLINE
DOWNLOAD E
CORANT
COMPLETO
PRIME CU 12AM RIBA
WWW.AWEMAINTA.COM